



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Parlamentu Nasionál
4 Dezembru 2014

Deputada Parlamentu Nasionál preokupa kona-ba kestaun violénsia hasoru fetu iha debate Orsamentu Estadu ba Tinan 2015

Iha 03 Dezembru 2014, Parlamentu Nasionál hala'o plenária ho agenda mak halo diskusaun no votasaun iha generalidade ba Proposta de Lei Nú.º 16/III (3ª) kona-ba Orsamentu Jerál Estadu ba tinan 2015 ne'ebé oras ne'e dadaun sei kontinua diskuti hela.

Deputada Alvina Marçal Freitas husi Bankada CNRT no deputada Olinda Morais husi bankada PD preokupa hodi kestiona kona-ba problema ne'ebé fetu infrenta durante debate ba planu governu iha 2015. Liu-liu atu haree ba kazu inestu, abandona familia, violénsia doméstika, divorsiu ne'ebé oras ne'e fetu no labarik sira infrenta. Kazu hirak ne'e sai preokupasaun bo'ot ba públiku no deputada sira husu atu governu bele halo planu asaun konkreta ba kombate problema sira ne'e.

JSMP haksolok atu hare katak deputada sira ne'ebe kontinua fo atensaun ba kestaun sira ne'e durante debate OJE no ezije ba instituisaun relevante atu halo planu konkreta atu hatan ba situasaun sira ne'e.

“JSMP hanoin katak atu kombate asuntu inestu no violasaun sira seluk hasoru fetu, importante atu konsidera alterasaun ba Kódigu Penál aplikavel atu inkorpora provizaun espesifiku ba asuntu inestu,” dehan Direktur Ezekutivu JSMP, Luis de Oliveira Sampaio.

Oras ne'e dadaun, JSMP prepara hela submisaun atu halo alterasaun komprehensivu ba provizaun kodigu penál atu proteze diak liu fetu no labarik sira iha kazu violénsia bazeia ba jéneru. JSMP hein katak iha tinan 2015, bele hetan oportunidade atu deskuti kestaun hirak ne'e ho Parlamentu Nasionál.

JSMP mós espera katak ba planu OJE ba tinan fiscal 2015 sei fó prioridade atu kria kondisaun ba vítima sira ne'ebé infrenta kazu hirak ne'e.

JSMP rekomenda ba Parlamentu no Governu konsidera importansia ba alterasaun ba Kodigu Penal hodi evita no proteze diak liu vítima inestu sira no krime ho natureza violénsia bazeia ba jéneru sira seluk.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPTl